

INUIT ATAQATIGIIT

INATSISARTUNI



Nuuk, 3. december, 2013

Inatsisartut suleriaasianni § 37 naapertorlugu Naalakkersuisunut makkuningga apeqquteqaateqarpunga:

(Inatsisartunut ilaasortaq Sara Olsvig, Inuit Ataqatigiit)

Apeqqutit:

1. Kalaallit Nunaanni meeqqat inatsisitigit inissisimanerat pillugu inatsisissatut siunnersuutip aammalu inatsisip Kalaallit Nunaanni kingornussisarnermut tunngasup (inatsisit naapertorlugit ataataqanngitsut taaneqartartunut tunngasoq) allannguutissatut siunnersuummut maannamut ataataqanngitsut, ataatarsineqareeraluarlutik kingornussinissaminnut periarfissaqanngitsut aamma inatsisit naapertorlugit ataataqanngitsut ataatamik kinaassusaannik aalajangiiffigineqanngitsut, pilersuisussaataitasup peerussimanerata sumiiffeerussineqarnerataluunniit kingunerisaanik, naalagaaffimmiit arlaatigut taarsiiffigineqarnissaannik Inatsisartut tamarmiullutik innersuussillutik ilaliinerat atortussanngortitsinerallu pillugu Folke-tingip Kalaallit Nunaannut Ataatsimiititaliaata apeqqutaanut novemberip 29-ani danskit naalakkersuisui akissumminni allapput "taamatut taarsiiffigineqarnissamik aaqqissuussisoqalersinnaaneq matumuuna inatsisissatut siunnersuutigineqartup privatitut peqataasut akornanni inatsisitigit pissutsinik malittarisaliuussisup avataaniippoq taamaammallu innersuussineq inatsisissatut siunnersuummik allanngortitsisussaangilaq." Akissummut tamatumunnga Naalakkersuisut qanoq isumaqarpat?
2. Naalakkersuisut imm. 17-ip aappassaaneerreqarnerani akissuteqaamminni aallapput "Maannamut ataataqanngitsut, ataatarsineqareeraluarlutik kingornussinissaminnut periarfissaqanngitsut aamma inatsisit naapertorlugit ataataqanngitsut ataatamik kinaassusaannik aalajangiiffigineqanngitsut, pilersuisussaataitasup peerussimanerata sumiiffeerussineqarnerataluunniit kingunerisaanik, naalagaaffimmiit taarsiiffigineqarnissaannik piumasaqarneq Naalakkersuisut tapersersorluinnarpaat." Taartisiaqartitsinissamik aaqqiissuussinerup tamatumatimitalerneqarnissaa pillugu Naalakkersuisut qanoq iliuseqarniarpat?
3. Qulaanisut allaatigineqartutut inatsisit naapertorlugit ataataqanngitsut eqqorneqartut naammaginantumik taartisiaqarnissaat Naalakkersuisut qanoq innersuussuteqarfiginnaavaat?
4. Allannguutissatut siunnersuut Inatsisartut akuerinikuusaat pillugu Naalakkersuisut aamma qanoq eqqarsaatersuuteqarpat, kiisalu allannguutissatut siunnersuut Naalakkersuisut qanoq kinguneqassangatippaat?

Tunngavilersuut:

Kalaallit Nunaanni meeqqat inatsisitigit inissisimanerat pillugu inatsisissatut siunnersuut aammalu inatsit Kalaallit Nunaanni kingornussisarnermut tunngasoq Inatsisartut aappassaaneernikuuaat tassungalu atatillugu inatsisissatut missingersuummut danskit naalakkersuisuisa saqqummiussaannut allannguutissatut siunnersuut Inatsisinut Ataatsimiititaliap tamarmiusup akueralugu. Allannguutissatut siunnersuutikkut innersuussutigineqarpoq maannamut ataataqanngitsut, ataatarsineqareeraluarlutik kingornussinissaminnut periarfissaqanngitsut aamma inatsisit naapertorlugit ataataqanngitsut ataatamik kinaassusaannik aalajangiiffigineqanngitsut, pilersuisussaataitasup peerussimanerata sumiiffeerussineqarnerataluunniit kingunerisaanik, naalagaaffimmiit arlaatigut taarsiiffigitinneqassasut. Allanguutissatut siunnersuut akueralugu Inatsisartut tamarmiusut taasipput.

Inatsisissatut siunnersuut maanna Folketingimi suliarineqaleruttoq. Tassunga atatillugu inatsisit naapertorlugit ataataqanngitsunut inatsisissatut massakut missingersuutigineqartukkut assigiinngisitsinermik nutaamik eqqorneqalersunut arlaatigut taarsiiffigineqaqqullugit Inatsisartut innersuussuteqarnerat pillugu Folketingip Kalaallit Nunaannut Ataatsimiititaliaa danskit naalakkersuisuinut apeqquteqaateqarpoq. Apeqqummut tassunga danskit naalakkersuisui akissuteqaamminni allapput isumaqarlutik taamatut taartisiaqartitsinissamik aqqissuussineq inatsisissatut maanna siunnersuutigineqartup iluaniinngitsoq. Akissulli isumaqanngilaq inatsisissatut allannguuteqarnikkut isumarpiarineqarmat inatsisit naapertorlugit ataataqanngitsut tamarmik assigiinngisitsiffigineqarsimanerat naqqinneqassasoq, taamaattumillu aamma Inatsisartut allannguutissatut siunnersuutaat ilanngunnagu inatsisissatut siunnersuut akuerineqassagaluarpat inatsisit naapertorlugit ataataqanngitsut inatsisit naapertorlugit toqukkut qimagussimasumik ataataqartut, kingornussassallu naatsorsorneqareersimallutik, kiisalu pilersuisussaataaneq pillugu suliamik tammaaffigitissimasut sumiiffeerussiffigitissimasulluunniit nutaamik assigiinngisitsiffigineqalertussaanagerat naqqinneqassasoq.

Taamaammat Inatsisartut allannguutissatut siunnersuutaat eqqarsaatigalugu danskit naalakkersuisuisa akissutaat Naalakkersuisut qanoq isumaqarfigineraat, aammalu suliamut tassunga Naalakkersuisut allanik qanoq eqqarsaatersuuteqarnerat paasisallugu pingaaruteqarpoq.

Akissuteqaat sapinngisamik piaarnerpaamik, aammalu ullut suliffiusut qulit qaangiutsinagit, Inatsisartunut apuunneqallaqunarpoq.